

nensi , & prædictum relevatum interdicti
per Dominum Joannem de Sulhaaens Cano-
nicum Colimbriensem.

1236 In Era millessima CCLXXIII. pressa fuit *Corduba* à Rege Castellæ & Legionensium , sive Dño. Fernando in die commemorationis Sancti Pauli.

In Era MCCLXXXVII. pressa fuit *Hispalis* à Rege Castellæ & Legionensium Dño. Fernando in die Petri Episcopi & Martyris. (1)

1199

Tertio Nonas Junii in eadem die qua Christus passus fuit , scilicet feria VI. & in eadem hora qua tenebræ factæ fuerunt per universum mundum in passione Domini , scilicet à sexta usque ad nonam , sub Era MCCXXXVII. facta fuerunt signa qualia nunquam fuerunt à passione Domini usque ad supradictam Eram : fuit enim intra sextam & VIII. vere nox , & Sol factus fuit nigrior pice , & Luna ac plura sydera in Cælo apparuerunt : deinde recedente nocte illa tenebræ subsecutæ fuerunt , quibus recedentibus & recuperante Sole vim claritatis suæ , congregata in Ecclesia Sanctæ Crucis Colimbriæ maxima multitudine hominum & mulierum , tam sæcularium quam Religiosorum , cum omnes unanimiter præ nimio timore non aliud quam mortem subitam expectantes clamarent & ulularent , ac divinum subsidium implorarent , quibusdam ex fratribus *Te Deum laudamus* , & Letaniam cum difficultate maxima canentibus , & divinam exorantibus pietatem , semivivis & stupefactis aliis omnibus manentibus , ac inde admirantibus universis , in Choro Sanctæ Crucis Colimbriæ VII signa Lunarum apparuerunt quartarum existentium vel quintarum , quæ signa ibi ante neque postea sunt inspecta : hujusmodi autem Lunarum signa per totam Colimbriæ Civitatem apparuisse multis exitit manifestum , ubicumque Solis radii per foramen aliquod subintrabant.

Era

(1) Vide An. Compostel. in fine.